

Акафист преподобным схимонаху Кириллу и схимонахине Марии, родителям преподобного Сергия Радонежского

Кондак 1

Избранныи чудотворцы и велицыи угодницы Господни, обители нашея заступницы и приснии о душах наших молитвенницы, преподобнии схимонаше Кирилле и схимонахине Марие! Пение похвальное вам приносяще, молим вы усердно: яко имущии дерзновение ко Господу, предстательством вашим от всяких бед нас свободите и наследники Царствия Небеснаго нас соделайте, да зовем вам радостно: Радуйтесь, преподобнии Кирилле и Марие, блазии о нас пред Богом заступницы.

Икос 1

Ангели земнии и человецы небеснии воистину явистеся преподобнии Кирилле и Марие, от юности вашея чистую совесть имущии к Богу, и добре во благочестии и чистоте вкупе пожившии, нам же оставльшии в пример подражания житие ваше богоугодное, емуже чудящися и чудеса вашими озаряеми, зовем вам гласы хвалебными сице: Радуйтесь, от юности вашея Христа возлюбившии и Тому от души поработавшии; Радуйтесь, целомудрия хранители и душевныя и телесныя чистоты рачители. Радуйтесь, души ваши и телеса на земли в обителище Духа Святаго уготовившии; Радуйтесь, исполненнии премудрости и разума Божественнаго. Радуйтесь, яко от земли на небо преидосте и тамо со Ангелы Троице предстоите; Радуйтесь, яко со безплотными лики трисвятую песнь ей воспеваете. Радуйтесь, на небеси и на земли от Господа прославленнии; Радуйтесь, обретшии вечное всесветлое место упокоения. Радуйтесь, преподобнии Кирилле и Марие, блазии о нас пред Богом заступницы.

Кондак 2

Видя всевидящее око Отца светов вельми благоугодное Богу ваше житие, благоволи избрати вас, блаженнии, да явите миру светильник пресветлый Сергия преподобнаго, да о нем и ваши имена прославятся и вси вернии воспоят прославльшему вас Господеву: Аллилуиа.

Икос 2

Разума Божественнаго преисполненнии, Кирилле и Марие, неустанно работасте Господеву, наставляя чада своя в послушании и

кротости. Умудрите убо и нас, преподобнии, непрестанно оправданием Господним следовати неложно, да обрящем вкупе с вами спасение вечное и принесем вам благохваления таковыя: Радуйтесь, блаженнии, в боголюбии пожившии и благоверие сохраниши; Радуйтесь, милости и сострадания преисполненнии. Радуйтесь, милостынею и молитвами Небесное Царствие стяжавшии; Радуйтесь, смирением и пощением вечное блаженство улучившии. Радуйтесь, яко мзда ваша многа на Небесех есть; Радуйтесь, яко молитвами вашими и мы надежды Царствия Христова не лишаемся. Радуйтесь, яко радость ваша вечна во светлостех святых; Радуйтесь, яко тояжде светлости вас ради и мы наследниками являемся. Радуйтесь, преподобнии Кирилле и Марие, блазии о нас пред Богом заступницы.

Кондак 3

Силою Божиею ограждаемь преподобный Кирилл князю Ростовскому со всяким усердием служаше и вкупе с ним во орду Агарянскую, мира ради, хождаше, да люди русские ослабу от ига их имут и Богу непрестанно поют: Аллилуиа.

Икос 3

Имущи помышление преподобнии Кирилл и Мария и людие о трикратном во чреве Мариином в церкви плода глашении и удивльшеся, разумеша нечто преславное и чудное быти; и по сих уведевше радостное сына рождение, радовахуся и радостная вам приношаху глаголюще: Радуйтесь, двоице пресветлая, Богом совокупленная; Радуйтесь, звезды непрелестнии, путь супружескаго жития богоугоднаго верно указующии. Радуйтесь, родители благии добраго и избраннаго плода; Радуйтесь, всякия благодати Божия его исполнившии. Радуйтесь, супругов христиан ко благочестию наставницы; Радуйтесь, доброму богобоязненному чад воспитанию их научающии. Радуйтесь, целомудрия и воздержания супружескаго образи преизящнии; Радуйтесь, хотящих богоугодно жити богомудрии учителяе. Радуйтесь, преподобнии Кирилле и Марие, блазии о нас пред Богом заступницы.

Кондак 4

Буря скорбей и напастей, воздвигаемая наместником Великаго Князя, не ослаби крепкия любве вашае яже к Богу, Кирилле и Марие блаженнии, но паче научи вы изряднее отражати разжennыя стрелы лукаваго. Научите убо и нас вся скорби мира сего с кротостию преносити, в веселии вопия Богу: Аллилуиа.

Икос 4

Слышавше, блаженнии, Варфоломея, дивное чадое ваше, некогда грамоте неискусна, чтуща богодухновенныя писмены, удивившася зело, и старца-схимника, премудрость ему даровавшаго, в дом свой прияша, заповедь Апостола Павла храняше: страннлюбия не забывают; тем бо не ведяще неции странноприяша Ангелы. Таковую добродетель вашу воспевающе, вопием вам сице: Радуйтесь, заповедей Христовых вернии исполнители; Радуйтесь, учения Евангельского истиннии последователи. Радуйтесь, угодницы Божии, житию великих святых сопричастницы; Радуйтесь, странноприимства древняго праотца Авраама подражатели. Радуйтесь, светом благочестнаго жития вашего, яко светила богосветлая, пресиявшии; Радуйтесь, любовь и милосердие к бедным и сирым явившии. Радуйтесь, беспомощным скории помощницы; Радуйтесь, яко и нам присно помогаете и к Небесному Отечеству руководствуете. Радуйтесь, преподобнии Кирилле и Марие, блазии о нас пред Богом заступницы.

Кондак 5

Боготечным звездам подобны бысте, преблаженнии Кирилле и Марие, егда пришедше от страны Ростовския в пределы княжества Московскаго и во граде Радонеже поселистеся, тамо сущих бо людей благочестием своим удивисте, подвизая пети: Аллилуиа.

Икос 5

Видевше, святии, тщание сына своего, преподобнаго Сергия, к иноческому житию, моляху его, да пребудет с вами до кончины вашей. Он же, яко сын послушания, издетска наученный вами заповеди Господни исполняти, покорися воле вашей, Кирилле и Марие, якоже Божией, научая всех вопити вам тако: Радуйтесь, блаженств Христовых причастницы; Радуйтесь, честнаго супружества и попечения о чадех добрии образи. Радуйтесь, ангелонравнии человецы; Радуйтесь, преподобных и праведных сопричастницы. Радуйтесь, Пресвятая Троицы вернии угодницы; Радуйтесь, яко и чад ваших угождати Ей научившии. Радуйтесь, того ради сын ваш Триипостасному Божеству обитель дивную устройвый; Радуйтесь, сего ради и ваша святая имена прославлены есть по всей Руси. Радуйтесь, преподобнии Кирилле и Марие, блазии о нас пред Богом заступницы.

Кондак 6

Проповедницы веры православныя и ревнители благочестия не словом токмо, но и житием вашим, бысте во граде Радонеже, прехвальнии Кирилле и Марие: темже и святая Церковь достойно почитает вас, немолчно воспевая Дивному во святых Своих Богу: Аллилуиа.

Икос 6

Возсия во граде Радонеже свет добродетельнаго вашего жития, преблаженнии Кирилле и Марие; егда же достигше возраста преклонна, во обитель Хотьковскую устремишася под покров Божией Матери притекше, тамо велий образ Ангельский на ся восприяли есте, темже образ вышшаго нам смирения показуя, емуже поучаяся, с любовию вопием вам таковая: Радуйтесь, яко любве ради Господа мира сего славу остависте; Радуйтесь, яко иноческое равноангельное житие усердно восприясте. Радуйтесь, во обитель древнюю пришедшии и тамо покой себе обретшии; Радуйтесь, Пречистой Деве Богородице души свои вручившии. Радуйтесь, образ ангельский восприимшии и непорочно его сохранишии; Радуйтесь, всем иноком и инокиням добрии образи. Радуйтесь, прежде кончины вашае вся страсти умертвившии воздержанием; Радуйтесь, святую схиму в броню спасения восприявшии. Радуйтесь, преподобнии Кирилле и Марие, блазии о нас пред Богом заступницы.

Кондак 7

Хотя Человеколюбец Господь явити в житии вашем, преподобнии Кирилле и Марие, образ назидания, не токмо людем мирским, но и иноческому лику, внуши вам в старости маститей оставите славу земную и восприяти образ иноческий, в немже постом, бдением и молитвою добре подвизаетесь, неустанно воспевая Триединому Богу Серафимскую песнь: Аллилуиа.

Икос 7

Новую благодать показа всех Творец и Владыка чрез вас, преподобнии, егда прешли есте от временныя сея юдоли плачевныя во обители вечныя. Святыя мощи ваша, аще и под спудом сокровенны, многая чудеса источаху, многим болящим исцеления подаваху; паче же приносимыя к вам младенцы исцеляху. Сего ради примите, врачеве наши блаженнии, от нас похвалы сицевыя: Радуйтесь, смертию временною пришедшии к жизни вечней; Радуйтесь, от Господа нетлением и чудесы прославленнии. Радуйтесь, яко память ваша с похвалами и успение со святыми; Радуйтесь, яко имена ваша честны суть и благословенны во Отечестве вашем. Радуйтесь, болящим младенцем исцеление подающии; Радуйтесь, тяжко

болящую девицу, с любовью к вам притекшую, от недуга избавившии. Радуйтесь, о любящих и чтущих вас небеснии предстатели; Радуйтесь, приснопросящи нам у Господа дары благодати Его. Радуйтесь, преподобнии Кирилле и Марие, блазии о нас пред Богом заступницы.

Кондак 8

Страшное и ужасное бедствие прииде на землю Московскую, егда язвою моровою уязвлены быша людие мнози во градах и весех, и множество их умроша. Тогда собор освященный со инокини молебныя пения вам приношаху и предстательствы вашими избавление от беды получиша, вопиюще благодеющему чрез вас Богу: Аллилуиа.

Икос 8

Вси боголюбцы скорбию велию объаты быша, егда во дни лихолетий, на землю Российскую пришедших, обитель Покрова Пречистая Девы в Хотькове богоборцы разорению и запустению предаша. Но память о вас, преподобнии, в людех жива бысть, и славляху чада российския житие ваше и чудеса благохвалении сицевыми: Радуйтесь, чудотворцы наши предивныя; Радуйтесь, не оставляющи нас в скорбныя дни. Радуйтесь, града Хотькова и обители нашея ограждение несокрушимое; Радуйтесь, на враги видимыя и невидимыя крепции нам споборницы. Радуйтесь, благодеяний множество нам источающи; Радуйтесь, милостию сострадания вашего всех объемлющи. Радуйтесь, приснии всем нам ходатаи спасения; Радуйтесь, неотступнии града Хотькова и обители нашея хранители. Радуйтесь, преподобнии Кирилле и Марие, блазии о нас пред Богом заступницы.

Кондак 9

Вси Ангели и святых лики радовахуся радостью велию, егда обитель ваша, преподобнии Кирилле и Марие, Церкви возвращена бысть и мощи ваша честныя, от лет древних Богом сокровенныя, в храме соборнем положены бысть. И возженна бяху молитвы лампада и людие вси узревше свет ея удивляхуся зело, к вам в напастех прибегают и помощь от вас получают; еяже и нас сподобите преподобнии, о вас вопиющих Богу: Аллилуиа.

Икос 9

Витийство человеческое не довлеет к достойному прославлению чудес от мощей ваших и поныне совершающихся, преблаженнии Кирилле и Марие: старица бо немощная монахиня костное преломление претерпевшая и от врачей не утешанная, к вам, преподобнии, притекше и со слезами моляху вас. Вскоре же

исцеление совершенное получив, во умилении сердца воспеша вам: Радуйтесь, благодати Святаго Духа сосуди избраннии; Радуйтесь, радости нам вечныя благоприятнии ходатаи. Радуйтесь, старицу немощную от недуга скоро исцеливши; Радуйтесь, исцелением сим искусных врачей удививши. Радуйтесь, нетленные благоухающи цветы; Радуйтесь, безсмертия немерцающи лучи. Радуйтесь, на земли величием чудес блистающи; Радуйтесь, на небеси со Ангелы Бога славящи. Радуйтесь, преподобнии Кирилле и Марие, блазии о нас пред Богом заступница.

Кондак 10

Спасение вечное унаследовавше, богоблаженнии Кирилле и Марие, душами вашими во обителях горних неразлучно в Бозе пребываете, святыми же мощми вашими во обители Пренепорочныя Девы нетленно вкупе почиваете и обильная исцеления источаете, нас в Горний Иерусалим оный руководствуя, вопиющих того Града Управителю: Аллилуиа.

Икос 10

Стена и прибежище всем к вам притекающим вы есте, преподобнии. Обитель бо ваша к жизни иночестей возрожденная множество ищущих спасения собра, их же вы от искушений и соблазнов сохраните, блаженнии, и монашескому деланию научите, да улучивше желаемое, принесут вам сицевыя благодарственныя словеса: Радуйтесь, чадолюбивыя наши предстателие; Радуйтесь, руководствующии нас ко Христу Богу. Радуйтесь, наставляющи шествовати по заповедем Господним; Радуйтесь, научающи терпеливо носити крест свой и Владыце нашему последовати. Радуйтесь, яко с преподобным отцем нашим Сергием имеете дерзновение ко Христу Богу нашему и ко Святей Его Богоматери; Радуйтесь, яко вы есте ходатаи о нас недостойных, жительствующих во святей обители нашей, ей же вы и начальницы. Радуйтесь, яко Богом собранней дружине сей вы помощницы, заступницы и молитвенницы; Радуйтесь, яко вашими молитвами сохраняема невредимы от бесов и от человек злых пребываем. Радуйтесь, преподобнии Кирилле и Марие, блазии о нас пред Богом заступницы.

Кондак 11

Пение молебное приносят вам, преблаженнии Кирилле и Марие, не во обители Хотьковской токмо, но и в Высоцкой, сыном вашим основанней, многоцелебных мощей ваших часть имущей, славят чудеса вами совершаемыя: младенец бо недуг неисцельный имеяй,

исцеление от вас получает, родителей радости безмерныя исполняя, вопиющих исцелений подателю Богу: Аллилуиа.

Икос 11

Светом трисиянным осияваеми, Кирилле и Марие, всеблаженнии, со всеми святыми предстоите ныне на Небеси Престолу Царя царствующи-щих и отгуду, яко светила светозарнии, присно просвещаете души притекающих к раце мощей ваших и покаянию истинному научаете. Сего ради, прославляюще вас, глаголем: Радуйтесь, яко скончали есте жизнь свою телом, но духом не отступаете от нас; Радуйтесь, с верою приходящих к раце мощей ваших благодатно освящающих. Радуйтесь, бисери сияющих и благодатно просвещающих человеков; Радуйтесь, свети умнии, зарею Святаго Духа облистающих. Радуйтесь, известнии умилолюбители Царя Небеснаго; Радуйтесь, призывающих молитвенно честная имена ваши скории услышатели. Радуйтесь, упование на вас по Бозе возлагающих дивнии помощницы; Радуйтесь, всем правоверным всякое прошение во их пользу исполняющих. Радуйтесь, преподобнии Кирилле и Марие, блазии о нас пред Богом заступницы.

Кондак 12

Благодать от Бога данную вам ведяще, прилежно молим вы ныне, прехвальнии схимонаси: пролейте теплую о нас молитву ко Господу, да сохранит обитель нашу неврежденну от напастей и нестроений, и нас да помилует и спасет, вопиющих Ему: Аллилуиа.

Икос 12

Поюще ваше Богоугодное житие, преподобнии, и на небеси от Бога прославление, ублажаем праведное преставление ваше, величаем безчисленныя чудеса от святых мощей ваших истекающия, и на неусыпныя молитвы ваша уповающе, взываем вам сицевая: Радуйтесь, житие ваше земное благочестие скончавшии; Радуйтесь, от Царя Небеснаго венцы славы приемшии. Радуйтесь, обличеннии в ризу благодатнаго нетления; Радуйтесь, во благоухании святыни нетленно почивающих. Радуйтесь, препоясаннии силою многих чудес; Радуйтесь, яко рака ваша честная лечебница явися недугом человеческим. Радуйтесь, яко от нея всяк с верою приходяй дары целебныя приемлет; Радуйтесь, яко обитель наша мощей ради ваших по всей земле Российской прославляется. Радуйтесь, преподобнии Кирилле и Марие, блазии о нас пред Богом заступницы.

Кондак 13

О, преславнии чудотворцы и угодницы Господни Кирилле и Марие!
Приимите сия моления наша от всея души вам ныне возносимья и
сподобите нас предстательства вашими в чине ангельском достигнути
Небеснаго Царствия, идеже вси святии, Ангели и человецы воспевают
непрестанными гласы хвалу Пресвятей Троице, Богу нашему:
Аллилуиа, Аллилуиа, Аллилуиа.

(Этот кондак читается трижды, затем икос 1 и кондак 1)